

Noticia  
Transparente  
di Gobierno

# ISLA ONLINE

Diamars 28 Mei 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



**STABILIDAD  
Y  
PROSPERIDAD**  
2 0 2 4

**Gabinete Wever-Croes**





**Durante un reunion publico den Parlamento**

## **GOBIERNO DI ARUBA A DUNA PARLAMENTO MAS INFORMACION DI E ACUERDO CU HULANDA**

Diabierna ultimo den e reunion publico na Parlamento di Aruba, Gobierno di Aruba a duna mas informacion riba e acuerdo cu nan a yega cu Gobierno di Hulanda riba e tema di financiamiento di debe. Durante e reunion, Prome Minister Evelyn Wever-Croes a splica e acuerdo aki detayadamente, y a presenta tur e correspondencianan cu tabata tin pa cu e negociacion riba e acuerdo aki.

Prome Minister a indica cu e reunion a bay bon, y cu tabata tin hopi pregunta relaciona cu e acuerdo, cu a wordo contesta, pa asina aclarea cualkier duda cu por tabata tin. Parlamento tabata hopi interesa pa scucha kico lo ta e siguiente pasonan, mirando cu ta aki ta unda nan lo wordo involvi. Pa cu esaki, Prome Minister a reitera y confirma na nan cu Gobierno lo cana e caminda cu Parlamento a indica durante di un IPKO na Sint Maarten.

E acuerdo entre Gobierno di Aruba y Gobierno di Hulanda lo wordo firma pronto, pa asina e interes riba e debe di Covid-19, por baha di 6.9% pa 5.1%. Prome Minister a splica cu Parlamento a hunga un papel hopi importante pa cu e acuerdo aki, mirando cu nan tabata tin un posicion hopi firme pa no entrega, pa loke nan ta kere ta e autonomia di pais Aruba, sin haya nada a cambio. Pa cu esaki ta importante pa splica cu Parlamento lo mantene su autonomia bou di e LAft, pasobra e autonomia financiero a wordo entrega caba na 2015 door di AVP, dunando Hulanda un poder grandi pa tin e ultimo palabra den cambionan.

"Manera mi a menciona, mi lo a prefera di no mester a yega na un Rijkswet, pero mi ta hopi satisfecho cu e acuerdo aki, mirando cu e ta trece claridad, tranquilidad y e ta baha e interes, cu ta duna Aruba e aña aki 16 milyon florin cu por wordo inverti den proyectonan.



Pa loke ta oposicion, mi a keda desapunta ya cu no tabata tin niun interes di nan banda. Por a nota si cu nan tabata hopi rabia y disgusta, y a expresa di no por a kere cu un dia nos lo yega na e acuerdo aki, mustrando cu nan nunca tabata tin e intencionnan corecto pa cu e pueblo di Aruba.

E trayecto di e Rijkswet lo cuminsa pronto, manteniendo e autonomia di Parlamento y pais Aruba. E logro di e acuerdo aki ta un "game changer" pa Aruba, mirando cu e interes di e debe lo baha den beneficio di nos futuro generacionnan" Prome Minister a expresa. ■■■



**Prome Minister Evelyn Wever-Croes:  
Aruba ta haciendo un bon papel**

## **PROME MINISTER TA RESUMI E PROME DIA DI E CONFERENCIA DI SIDS NA ANTIGUA AND BARBUDA**

**Ta hunto cu paisnan similar nos lo por enfrenta retonan cu ta spera nos y na  
caminda tambe nos por yega na miho palabracionnan cu Hulanda**



Desde Dialuna 27 di mei a cuminsa e 4th International Conference on Small Island Developing States SIDS. E conferencia aki ta wordo organisa pa Nacionnan Uni y ta tuma luga un biaha cada 10 aña. Prome Minister Evelyn Wever-Croes ta na Antigua & Barbuda pa atende e conferencia aki cu ta hopi importante pa paisnan chikito manera Aruba.

Ayera a tuma luga e apertura di e conferencia y esaki tawata uno impresionante unda por wak e compromiso di Nacionnan Uni pa cu e islanan. Durante e dianan venidero ta bay tin diferente reunion, encuentro y conferencianan y asina durante esakinan concretisa e ayudo pa e paisnan chikito.

### **ENFOKE DI E CONFERENCIA**

E conferencia ta enfoca riba e vulnerabilidadnan y e retonan cu paisnan chikito ta enfrenta den e mundo global. E paisnan aki ta enfrenta e mesun retonan manera e guerra na Ukraine, e conflicto entre Israel y Palestina, e efectonan di e pandemia di covid y e cambio climatico. E efectonan riba un pais chikito ta hopi mas grandi cu riba paisnan grandi y p'esey ta importante den cuadro di Nacionnan Uni, no solamente pa reuni cu tur pais, pero tambe ta importante pa intercambia cu otro paisnan similar na Aruba con pa atende cu e retonan y presenta

solucionnan.

### **REUNION PLENARIA**

Durante e reunion plenaria ayera Aruba a presenta e Statement di Reino cu ta algo hopi grandi ya cu den esey ta wordo fiha e vision di Aruba y ta muestra kico tur ta haciendo. Prome Minister a papia akinan den nomber di Aruba, pero tambe den nomber di Corsou y Sint Maarten.

### **REUNION CU SECRETARIO GENERAL DI UN**

Riba e dia di ayera tambe Prome Minister a reuni cu Secretario General di Nacionnan Uni, señor Antonio Guterrez, unda el a trece su puntonan dilanti y a pidi señor Guterrez pa e sigui haci su esfuersonan pa convence paisnan grandi, pa por ehempel e debe grandi di covid cu Aruba tin cu Hulanda, no keda asina. Paisnan chikito manera Aruba mester por haya dispensacion di debe pa por sobrevivi y inverti entre otro den e cambio climatico cu ta un echo importante cu tin pa atende cu ne. E tema aki di dispensacion di debe ta uno cu e mandatario di Aruba a bin ta trece dilanti desde aña 2020 di e pandemia y sinembargo Hulanda ta rechasa esaki categoricamente, y pa e motibo aki ta bolbe trece e tema dilanti na Nacionnan Uni.



## Continuacion **PROME MINISTER TA RESUMI E PROME DIA DI E CONFERENCIA DI SIDS....**



### **CONFERENCIA UNESCO CIENCIA DI OCEANO**

Prome Minister tambe a atende un conferencia di UNESCO (United Nations Educational, Scientific and Cultural Organization) riba e tema di Ciencia di Oceano unda a pone enfasis riba e importancia di tin e conocimiento y data di esaki y asina por adresa e retonan na e miho manera posibel.

Dinner Prome Minister Antigua & Barbuda

Durante anochi di e prome dia di conferencia, Prome Minister di Antigua & Barbuda, señor Gaston Browne, a ricibi Prome Minister na un dinner oficial unda durante momentonan masha ameno, por a intercambia di opinion riba varios tema importante.

### **VARIOS OTRO REUNION**

Durante e dialuna aki tawatin varios otro encuentro unda Prome Minister a hiba palabra y semper a sigui pone enfasis riba e importancia pa un pais chikito haya compromiso di paisnan grandi pasobra e polucion cu tin na mundo tanto den susedad como e emision di carbono di uzo di Fuel Oil, apesar cu Aruba ta un pais chikito riba mapa, e efecto riba e isla ta grandi.

### **CONTINUACION DI E CONFERENCIA DIAMARS 28 MEI**


E conferencia ta continua Diamars, unda lo sigui reuni riba e aspectonan financiero y posibilidadnan pa Aruba. Prome Minister ta remarca cu Hulanda ta dispuesto pa pone hopi placa disponibel pa yuda henter mundo y awor cu Aruba tin un



acuerdo riba mesa cu Hulanda ta bira tempo cu Aruba por logra yega na e fondonan ey cu si ta disponibel pa otro. Esey ta un di e metanan principal di tur e esfuersonan cu e mandatario, den nomber di Aruba, ta haciendo na e conferencia aki.

*“Aruba ta haciendo un bon papel, tin hopi respet pa e forma cu nos a atende cu e pandemia y con nos ta atende cu crisisnan, pero principalmente tin aprecio pa e forma constructivo cu nos ta comparti nos exitonan aki cu otro, y esey ta yuda nos cera mas amistad cu otro paisnan. Ta hunto cu paisnan similar nos lo por enfrenta retonan cu ta spera nos, y na caminda tambe nos por yega na miho palabracionnan cu Hulanda awor cu nos a yega na un acuerdo caba cu nan”, Prome Minister a menciona.*





4TH INTERNATIONAL  
CONFERENCE ON  
**Small Island  
Developing States**  
2024

[un.org/smallislands](https://un.org/smallislands)





MINISTER

*Ursell Arends*

**En connexion cu Dutch Caribbean Agriculture Livestock and Fisheries Alliance Conference 2024:**

## **DELEGACION DI ARUBA A RICIBI RECORIDO DI INICIATIVANAN DEN SECTOR PRIMARIO NA SINT EUSTATIUS Y SABA**



Diadomingo ultimo Minister di Naturalesa, Sr. Ursell Arends encarga cu sector primario a wordo ricibi cu un caluroso bon bini na Sint Eustatius y Saba. E delegacion di Aruba ta consisti di Minister Arends, Directora di Santa Rosa Aruba, Sra. Nathalie Maduro y Chef Afdeling Visserij na Santa Rosa, Sr. Byron Boekhoudt.

E conferencia Dutch Caribbean Agriculture Livestock and Fisheries Alliance (DCALFA) a tuma luga pa prome biaha na october 2022 na Corsou, despues na mei 2023 Aruba tabata e host, y e aña aki e la wordo organisa door di Gobierno di Sint Eustatius. Un conferencia cu ta brinda oportunidad valioso pa experiencia personalmente e iniciativanan cu ta tumando luga den sector primario na islanan den Reino Hulandes. E biaha aki a experiencia ambos Sint Eustatius y Saba.

Diadomingo marduga delegacion di Aruba y participantenan di e conferencia a reuni pa hunto bishita Saba. A ricibi recorrido na varios sitio di agricola, entre nan criadonan local di galiña



y cabrito, un instancia di hydroponics, Fundacion Saba Reach y e edificio cu ta facilita e piscadonan di Saba pa warda nan materialnan.

Dialuna Minister Arends y Directora di Santa Rosa a bishita e Departamento di Agricultura, Cria y Pesca di Sint Eustatius(Statia), acompaña pa Sra. Sharon Veira, kende ta encarga cu e parti di Agricultura y Servicio Veterinario. Durante e bishita por a observa e diferente actividadnan agricola, conoce cunukeronan local y explora proyectonan di reforestacion na e isla, incluyendo e costa di Zeelandia.

E experiencianan aki a marca un tremendo comienso pa e conferencia DCALFA 2024, demostrando e dedicacion di esnan cu ta encarga cu sector primario di e islanan den Reino Hulandes. Asina tambe subrayando e importancia di un red cooperativo y solido entre e islanan pa asegura un futuro robusto di e sector.









MINISTER

*Geoffrey Wever*

## ORANGE ECONOMY: DI VISION PA ACCION PA STIMULA E INDUSTRIA CREATIVO NA ARUBA



E industria creativo tambe conoce diferente reto ora ta papia di eherce actividad creativo comercialmente. Tambe ta reconoce cu tin oportunidadnan existente na Aruba. Esaki tabata puntonan cardinal cual a dialoga riba dje durante e 'Orange Economy Symposium'. Minister Geoffrey Wever conhuntamente cu un panel diversifica di stakeholders y artistanan local a discuti riba e tema di e potencial y necesidadnan di e industria creativo.

Economia Oraño ta encera cu e industria creativo ta ser considera como un pilar economico. Pa logra esaki mester empodera empresarionan pa eherce nan creatividad como actividad comercial. Diferente stakeholders a comparti nan experiencia y duna feedback di e retonan personal como personanan activo den e industria creativo, sea den arte, musica, baile, diseño, of mas. For di e feedback aki minister Wever a menciona cu e Ministerio di Asuntonan Economico lo crea un Plan di Accion pa Industria Creativo pa por ser implementa.

### FINANCIAMENTO TA UN RETO PA INDUSTRIA CREATIVO.

Un punto cu a capta atencion ta e Financiamiento pa entrepreneurs creativo. Esaki Minister Geoffrey Wever a splica con similarmente a implementa e Agri Fund pa financiamiento

di proyectonan agricola, cual anteriormente tambe tabata imposibel - cu esaki por ta un modelo cu lo por ser replica pa e industria creativo.

### SAN NICOLAS COMO EPICENTRO CREATIVO REGIONAL.

Minister Wever a indica di tin intencion pa logra clasifica San Nicolas como un UNESCO Creative City - caminda ta pone industria creativo na e centro di su plan di desaroyo. Esey ta bai tuma esfuerso conhunto, pa cual e Symposium tabata un paso chikito pero importante.

Minister Geoffrey Wever ta contento pa e oportunidad pa por a presenta su vision pa yuda boost San Nicolas su desaroyo creativo. A enfatisa cu lo tuma e feedback ricibi y lo enfoca riba metodonan pa stimula y empodera nos artistanan local, pa nan por eherce nan creatividad comercialmente y desaroya e industria mas aun.

Minister Geoffrey Wever ta gradici tur esnan presente, tur e panelistanan y moderador pa nan participacion y contribucion valioso. Un gradicimento tambe ta bai pa Departamento di Asuntonan Economico pa a organisa e evento aki.







**Minister Geoffrey Wever**

# 'OPEN CALL' NA ARTISTANAN LOCAL: OPORTUNIDAD PA DISEÑA INSTALACION ARTISTICO PA PLAZA COMERCIO



Durante e Orange Economy Symposium, Minister Geoffrey Wever a anuncia un 'Open Call' pa un instalacion artistico na Plaza Comercio situa na crusada di Wilhelminastraat y Columbusstraat na Oranjestad. Artistanan local ta encurasha pa manda nan "proposal" pa un concepto creativo pa un instalacion artistico.

E meta ta pa crea un intalacion artistico (landmark) pa atrae turista y local pa centro di Oranjestad, pa por ehempel saca potret y asina crea fluho di hende cu por bira clientela di e restaurantnan den e area di Wilhelminastraat y Columusstraat.

Plaza Comercio mester bira un centro gastronoomico, p'esey mester considera cu e obra di arte aki mester por sirbi como un luga pa saca potret, celebrando e spirito di iniciativa, resiliencia, innovacion, y creatividad cu ta defini e ciudad.

E instalacion artistico su dimensionnan WxL ta 2.1 x 2.1 meter. Pa detayes exacto, mas informacion y tambe por entrega un proposicion, acudi na e website:

[https://experienceoranjestad.com/artist\\_submission/](https://experienceoranjestad.com/artist_submission/)

Minister Wever a indica di ta contento di mira e resultadonan inicial di revitalisacion den e areadi Wilhelminastraat. "Cu e instalacion artisitico nos kier atrae mas hende pa e centro di Oranjestad. Nos ta spera di por ricibi propuestanan inspirante cu por enrikece e panorama di e area", minister Wever a termina. ■

## SINTONISA

### CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



**Minister Geoffrey Wever:**

# RENOVACION DI CAS VENERANDA TA DEN "FULL SWING"



Minister Geoffrey Wever awe a haci un recorrido di Cas Veneranda den Wilhelminastraat. Por a tuma nota cu e trabounan ta andando segun plan. Hunto pa duna e recorrido tabata Sra. Daphne Every y Sra. Anne Witsenburg di Stichting Monumentenfonds, kende ta esnan cu ta maneha e proyecto di restauracion.

Actualmente e proyecto ta den e fase di demolicion y preparacion pa bai un destaho publico, pa e restauracion di e edificio en cuestion. Durante e recorrido por a presencia e mahestad di e edificio clasico y e proceso cu lo termina den un hoyo edificio y un otro herencia cultural den Oranjestad.

Banda di restauracion di e edificio y conserva e aspectonan original di e edificio, lo combina adaptacionnan "arquitectonico" moderno y asina crea un edificio cu caracter multifuncional. E espacio lo acapara diferente actividad economico. Departamento di Asuntonan Economico miho conoci como DEZHI lo establece su mes den e edificio aki tambe ta inclui un espacio pa reunionnan priva na disponibilidad di publico, como tambe un restaurant.

Cu e diferente actividadnan aki ta segura cu mas hende tambe por haci uzo di e edificio, y goza di un di edificacionan mas iconico den nos centro di ciudad. E restauracion aki ta parti di un strategia holistico di Minister Geoffrey Wever. Restaurando edificacionan di balor monumental, trece departamentonan gubernamental den caya, hisa e calidad di e infraestructura rond di Oranjestad hunto cu esfuersonan pa mas accesibilidad y seguridad ta accionan cu hunto mester hiba nos bek na un centro di ciudad revitalisa. "Un ciudad mas prospero. Un ciudad cu ta cumpli cu tur e rekisitonan pa ta un ciudad comercial viabel" segun minister Geoffrey Wever.

Minister Geoffrey Wever ta agradeci Monumentenfonds pa a haci un "site visit" y asina presencia e trabounan andando, y tambe e compania General Property Services pa nan trabou y conocimiento despliega. Den 2025, ta spera di por pone e memoria di un ruina cu hopi potencial un banda y cuminsa un capitulo nobo como un edificio restaura den un hoyo cu un historia rico y un 'ciudadano' digno di nos centro di ciudad.








## TA TRAHANDO RIBA DIFERENTE ASPECTO DI PEN 2023 Y E RECOMENDACIONNAN DI DOORLICHTING RAPPORT

Minister di Enseñansa y Deporte Endy Croes a dialoga tocante PEN 2023 y e rumbo digital cu nos mester bay. Minister Endy Croes a indica cu e ta opta pa “hybrid”, cual ta un combinacion di les digital y les klassikaal. Di e forma aki e alumnonan no ta perde contacto di e parti social. Tin diferente scol cu ta uzando licentie caba na Aruba y ora bo uza licentie mester di laptop, etc. Na Aruba no tin un estudio avansa riba e tereno di tecnologia ainda. Ademá cu e ta estudio hopi costoso, mester evalua si por haci esaki na un pais asina chikito. Door di escala asina chikito, no lo por prepara un klas tur aña y despues no tin trabou pa tur.



Minister Endy Croes a dialoga tocante e 13 recomendacionnan di e Doorlichting van het Arubaanse Onderwijsbestel. A bin cinco (5) inspector di Hulanda cu a haci un investigacion amplio den enseñansa hunto cu e inspectornan di Aruba. Ta trahando riba diferente recomendacion entre otro, recomendacion 11 cu ta modernisacion di e leynan. Proyecto di modernisacion di leynan di enseñansa ta encera pa modernisa e leynan di scol preparatorio, scol basico y scol secundario. Pero tambe ta encera pa traha e leynan nobo pa enseñansa profesional (Beroeps Onderwijs), enseñansa superior (Hoger Onderwijs), enseñansa special (Speciaal Onderwijs) y Landsverordening Onderwijstoezicht (LOT).

Aña pasa a cuminsa traha e Landsverordening pa Inspeccion di Enseñansa, cual ta e ley di LOT. A presenta ley di LOT caba na Directie Wetgeving en Juridische Zaken (DWJZ) y pronto

lo trat’e den Parlamento di Aruba. E siguiente cu ta trahando riba dje ta e ley di Beroeps Onderwijs y ta spera cu den e luna di october proximo por presenta esaki den Parlamento di Aruba. Ademá di esaki, di acuerdo cu recomendacion 1 di Doorlichtingsrapport, a inventarisa y a traha hopi di cerca cu Tijdelijke Werk Organisatie (TWO) y Ministerie van Binnenlandse Zaken en Koninkrijksrelaties (BZK) di Hulanda. A traha un Plan van Aanpak cu ta aproba desde october 2023 door di Hulanda. Hulanda a aproba 1.7 miyon florin pa realisa e Proyecto di Data, unda cu 85 scol di Aruba lo bay den un solo sistema, esta esta ‘Open Emis’ na Departamento di Enseñansa Aruba. Pues ta trahando riba diferente trabou riba tereno di enseñansa. Minister Endy Croes a indica cu e trabounan riba tereno di enseñansa no ta trabounan cu ta mira resultado di inmediato, pero cu si ta den proceso. 



# MINISTER ENDY CROES TA FELICITA RICARDO'S RESTAURANT CU APERTURA DI NAN DI DOS LOCALIDAD SITUA DEN ORANGE PLAZA MALL



Recientemente, den un esfera festivo Ricardo's Restaurant & Bar Aruba a celebra nan dies (10) aniversario cu apertura di nan localidad nobo situa den Orange Plaza Mall.

E celebracion a conta cu presencia di Minister Endy Croes acompaña pa su kerida esposa Dilailah Croes – Odor, Prome Minister di Aruba Evelyn Wever – Croes y Minister Xiomara Maduro. Memey di famia, amistad y demas invitadonan special, propietarionan Sra. Anky y Sr. Harold Chirino a haci e gran apertura, unda cu Sra. Anky a corta e cinta y asina e restaurant a keda oficialmente habri.

Ricardo's Restaurant ta ofrece nos local- y turistanan platonan delicioso y ta habri pa desayuno, almuerzo y cena. Pa conclui, Minister Endy Croes ta felicita e propietario di Ricardo's



Restaurant pa kere y inverti den economia di nos pais. Alabes ta felicita staf y personal cu apertura di dos restaurant y ta desea nan hopi exito. Pabien! 🇵🇪



**Minister Endy Croes:**

## **DURANTE "MEET & GREET" CU SR. KURT JOHNSON DI TVC A PRESENTA E FASE FINAL DI RENOBACION DI PISTA DI PALO MARGA**



Diabierna ultimo, a tuma luga Conferencia di Prensa di Gobierno di Aruba y "Meet & Greet" cu invitado special Sr. Kurt Johnson den e sala di Double Down Grill Restaurant na Eagle Resort. Durante e conferencia di prensa, Minister di Enseñansa y Deporte Endy Croes hunto cu Sr. Joy Werleman di Arubaanse Bond van Motorsport (ABM) y Sr. Kurt Johnson a informa Pueblo di Aruba tocante e desaroyonan di renobacion di e pista di Palo Marga. Sr. Kurt Johnson di e compania profesional di Merca Total Venue Concepts (TVC) ta un experto den e preparacion di pista di drag race na Merca y rond di mundo.

A uza un mix special pa e pista, esta "race quality asphalt". Pa prome biaha den historia, Aruba tin e "layer" di asphalt aki. Ademá di TVC, DOW, AWM y C2 tambe a forma parti di e proyecto e renobacion di e pista di Palo Marga. Sr. Kurt a indica cu e pista di Palo Marga lo ta acredita pa e standardnan internacional pa minimo un decada. A aloca alrededor di 2 milyon florin pa e renobacion di e pista di Palo Marga den su totalidad. Aki na Aruba nos no tabatin tur ekipo necesario pa renobacion di e pista, sinembargo a ricibi un oferta adicional pa complementa e proyecto aki a traves di e contactonan di Sr. Kurt Johnson.

A importa algun ekipo specialisa cu no tin na Aruba pa por a realisa e proyecto aki y a trece un team di experto di Merca pa ehersce algun trabou specialisa. Sr. Joy Werlemen a gradici Lotto pa Deporte, Gobierno di Aruba, Minister di Deporte Endy Croes y su team cu ta kere den e coredonan y a traha duro pa realisa e proyecto aki. Sr. Kurt Johnson, kende a traha riba diferente pista di drag race mundialmente y a traha cu gobierno di diferente pais, a indica cu Minister di Deporte Endy Croes y Sr. Joy Werleman a haci un gran trabou pa realisa e proyecto di e renobacion e pista. Finalmente, e mandatario di Deporte a gradici tur cu a traha cu alma y cuerpo den e renobacion di e pista di Palo Marga y ta haci peticion pa hunto nos cuid'e y manten'e den bon condicion. "Masha pabien na tur coredo cu e logro aki. Cu deseo, disciplina, dedicacion y determinacion ta logra", e mandatario di Deporte ta conclui.







# WEGANAN ESCOLAR

## GRAN APERTURA

1 DI JUNI 2024

6 PM

COMPLEHO DEPORTIVO  
NADI CROES & CRISMO ANGELA

- DESFILE DI E SCOLNAN • SHOW DI BAILE
- ENTRADA DI E ANTORCHA OLIMPICO
- MASCOTA WIWI • BRASSBAND Y MUCHO MAS.



Gabinete Wever - Croes II



Ministerio di Enseñansa y Deporte







**Minister Glenbert Croes a anuncia cu:**

## **EXPLORACION DI GAS TA BAY BIRA REALIDAD**



Dialuna ultimo e mandatario di Energia a haci dos anuncio sumamente importante pa Pais Aruba y nos Pueblo, ambos noticia cu ta logronan grandi cu lo tin su beneficio pa nos pueblo y nos futuro generacionnan.

Ademas di a anuncia e licencia otorga na Aruba door di Department of Treasury di Gobierno Mericano pa por busca petroleo di origen Venezolano, e di dos bon noticia ta cu diabierna ultimo Consejo di Minister unanimamente a aproba exploracion di gas den awanan teritorial di Aruba.

Armstrong Oil & Gas Inc. di Merca ta esun cu despues di a haci su sondeo den Caribe, finalmente a acerca Aruba pasobra den nan estudio preliminar nan a mira e awanan teritorial di Aruba cu un potencial grandi. Despues di investigacionnan mas dirigi, a logra identifica posibel posnan di gas den e lama di Aruba.

Pa Aruba esaki ta representa un desaroyo significativo pa e transicion pa energia limpi y economico, lo cual lo reduci e costonan di produccion di energia y awa beneficiando futuro generacionnan.

Minister Croes a expresa cu e posibilidad di Aruba tin su propio yacimiento di gas como fuente di energia ta un soño cu a nace den añanan 80 y cu awor por bira realidad. Despues cu e exploracion di Repsol no tabatin exito, Aruba toch a keda mantene e speranza di tin su mesun gas. Contando cu Armstrong su trayectoria exitoso den exploracion di gas cu casonan di exito manera esun di Alaska y Venezuela, e mandatario ta convenci cu e biaha aki si ta bai logra e obhetivo.

“E ta yena nos cu un speranza factible, un speranza tangible, un speranza berdadero cu e biaha aki si ta bay haña gas na Aruba”.

Tambe, Minister Glenbert Croes a probecha e rueda di prensa pa informa cu diaranson di e siman aki, e compania MPR hunto cu Utilities Aruba, lo duna un conferencia di prensa pa informa e resultado di e evaluacion y investigacion cu nan a haci na ELMAR y e solucion cu mester tuma pa drecha e problema cu coriente. ■





# Minister Glenbert Croes na Minister President Evelyn Wever-Croes: "DANKI MINISTER PRESIDENT EVELYN WEVER-CROES PA HACI LO CORECTO PA NOS PAIS, NOS PUEBLO, Y FUTURO GENERACIONNAN"



"Nos ta liber, ora nos ta convenci, cu e bon cu nos a haci, no ta keda destrui", ta palabranan di nos libertador Betico Croes, cu Minister Glenbert Croes a dedica na Prome Minister di Aruba relaciona cu e acuerdo cu Gobierno di Aruba a cera cu Gobierno di Hulanda.

Minister Croes a splica cu su persona, como minister, ciudadano di pais Aruba, y tata di 2 yiu muhe, si ta gradici Prome Minister pa a logra yega na e acuerdo aki, mirando cu esaki lo bay segura cu loke nos bieunan a logra, y futuro di henter e pueblo di Aruba, lo no por wordo destrui. E acuerdo aki tin un comienso y un final y ta pa segura, cu den futuro, no bin un gobierno di gobernanten loco, ladron y corrupto pa destrui tur locual cu nos bieunan a construi, y tur loke nos futuro generacionnan tin derecho riba dje.

Tambe e mandatario a indica cu e normanan cu tin, ta normanan cu e gobierno actual di Gabinete Wever-Croes, a bin ta cumpliendo cu nan caba. Gobierno a hiba un maneho financiero responsabel, reduciendo e debe, sigurando asina cu niun futuro gobierno bin destrui y desgracia e miho provenir di nos pueblo y di e generacionnan cu ta bin.

Na 2017, Gabinete Wever-Croes

a drenta gobernacion, y a hereda e desgracia financiero laga atras door di e gobierno di Mike Eman, y e desafionan di e crisis social. Despues na 2019, gobierno a hay'e confronta cu e crisis di covid, cu a pone mundo completo na rudia. A pesar di tur e retonan aki, Gabinete Wever-Croes consistiendo di ministernan serio y responsabel, a tuma e reto pa traha na rescata pais Aruba.

"Mi kier bisa Prome Minister: Bo a haci lo corecto pa nos pais, pa nos pueblo, pa e futuro di tur nos yiunan, y pa tur nieto y bisanietonan. Bo a salba nan futuro cu e acuerdo aki. Aruba ta bayendo den prosperidad economico, den un maneho financiero responsabel, pagando tur debe, cu e oportunidad pa por haci inversionnan den futuro, danki na bo lidarsago. P'esey awe mi ta gradici bo pa salba destino di nos pais."

Tambe mi kier gradici nos Minister di Finanzas Xiomara Maduro, Minister Ursell Arends, Minister Geoffrey Wever y tur otro minister cu ta forma parti di Consejo di Minister, pa sostene un decision cu ta segura cu Aruba hamas lo wordo poni den un posicion asina vulnerabel mas door di actonan di su propio gobiernonan.

"Nos ta liber, ora nos ta convenci cu e bon cu nos a haci, no ta keda destrui". Cu e acuerdo aki, Prome Minister ta segura cu e legado di nos bieunan y e futuro di nos yiunan hamas por wordo destrui" Minister Croes a expresa. ■

**"Nos ta liber  
ora nos ta convenci  
cu e bon cu nos a haci  
no ta keda destrui"**

*G. F. Betico Croes*





# 2024

## AÑA DI STABILIDAD Y PROSPERIDAD



### Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

